

Es war de Umsturz, de 23. August im 44er

Uffgschrieb for des Buch iwwer die Johrmarker Gasse vum Sehlersch Margret, verheirat Heckmann, for sei Mottr aus de Hinnerreih (Band 1/Ausschnitt)

In dem 44er Summer ware die Milone gut gerod, die häde uff de Mark misse, awwer es Militär had uns es letzte Pherd rekwireert. Mer hun uns e Pherd vum Goschys gelehnt, hun de Woon vollgelad`mit Milone un de annre Morjet hun mei Leit wolle in die Stadt fahre, die Milone verkaafe. Awwer weil mer Radio hade, e „Volksempfänger“, de hat mei Vattr vun de Bauersch gschenkt kriet, hot mei Vattr in dr Nacht vum Umsturz gheert. Was hot`r jetz mache selle, er hot sich net verrode wolle? Sie sin doch vun drhoom fortgfahr, sin awwer net weit kumm. In dr Happgass bei Tassingersch un Hangrischs hun Saldade, die Elevs, se zrickgschickt. Sie hun iwwer se gsaat, die Front kummt, un nix meh war mit Fratschle fahre an dem Tach. No sin se glei die Zimmermanns Gass nin un zrick gfahr. Es war de Umsturz, de 23. August im 44er.

Sie hun noh aa schun schieße gheert, ongeblich in Saklas un in de Mehaale. No hot mer ball schun gheert, dass die Saklaser Leit gflicht sin mit de Pheer un Weehn, mit Sack un Pack. In Johrmark is des Schlimmste ausgeblieb, die Front, de richtiche Kriech. In Johrmark is es Lewe weider gang un do ware jo noch die Milone! Zwaa Weehn voll Milone in dr Weinkammer un ka Pherd. Noh is mei Vattr uff Roman Bentschek gang, er hot wolle e Pherd kaafe. Er hot aa oons kriecht, awwer des war blinn. Er hot`s doch kaaft, er hot`s arich gebreicht. Er is nor bis uff Deitsch Bentschek kumm, noh hun se`m des Pherd schun wolle wegholle. Sei Glick war, dass des blinn war. Er is mit dem Pherd bis Hoom kumm un hot die Milone doch noch an de Mann gebrung.

Es war aa in dem Spätsummer, im 44er. Ich war loonich in dr Hinn`reih drhoom, noh is mei Grawatzer Großvattr aus dr Karlgass ausser sich dorch de Garte kumm un hot gfroot, wu unser Leit sin. Weil die awwer net do ware, hod`r gsaat, kumm mit! Ich sin mit in die Karlgass gang, noh hun ich aa schun gsiehn, was de Großvattr moont. Vun sei`m Garte aus hot mer weit uff`s Feld naus gsiehn. Es ware immer so Gruppe vun 8-10 Leit. Die sin uff`m Scharader Weech geger de Neiberch gang uff die Lippa`r Stroß zu, des is e ganze Taach so gang. Ka Mensch hot gewißt, vun wu die kumm sin un wu die hin gang sin. Sie hun noh gemoont im Dorf, des ware Ingsperre, vleicht ware die freigeloss noh`m Umsturz odr Saldade?

Phaar Teech später hun die Leit in dr Hinn`reih weder beinanner gstann, die Brikenarsch

Wess Suus, de Stefans Vettr Hans, de Schilos Hans, de Schmidts Vettr Pheder un meehr. Es war großi Uffregung. In de Gärter vun Jungches, Engels, Schilos, ware unner de große Nußbeem e Haufe fremde Leit mit Pheer un Weehn, des ware vleicht weder Koloniste odr so Flüchtlinge? Es hot ghaas, die Hingle insperre, alle Ställ un's Haus zuriegle un die junge Weiwer un Meed versteckle. Oweds, meehr ware schun schloofe gang, hot's an dr Teer gepollert un gekloppt, ans Fenster is gschlaa wor, dass die Scheiwe bal nausgflooh sin. Mei Vattr hot Licht gemach un die Teer uffgemach, noh sin phaar Männer in die Kammer gstermt, hun uff russisch gflucht un gekraascht. Des war net alles, sie hun alles uff de Kopp gstellt, an de Schänk die Teere uffgeriss, die Schublädcher vum Schank ausgeleert, Säcklticher, Koppticher, alles in die Mitt uff de Haufe geworf, noh sin se an de Schank mi'm Brod un Speck kumm. Des hun se im Mantlsack odr unnerm Mantlfuder verschwinne geloss. Des Dunstsach uff'm Schank hun se aa gsiehn, hun uffgemach, gekost, des war „harascho". Noh sin se an die Better kumm, hun die Ziech runner geriss. Des Bett war leer, im zwaate hun ich un mei Schwestr gschloof. Unser Mottr hot se gebitt, sie solle doch die Kinn schlofe losse, sie hun uns in Ruh geloss. Awwer gschloof hun mer nemmi, nor geziddert unner dr Ziech. Des Geld vun de Milone had die Mottr in Dunstglässer getoon for ingraawe, des hun se net fun im Bett. Noh hun se Wein verlangt. De Vattr is mit iwwer de Hof in die Weinkammer gang, do ware awwer nor Krumbeere, Milone un leere Fässer. E jedr hot sich e Milon mitgholl. Noh sin se zu dr Bauersch God ins Zimmer gang. De Vattr is mit gang, er war noch net im Zimmer, hade se die ald Fraa schun uff's Bett geworf un nor gekraascht, gflucht un eehre Kerchebuch aus'm Buss'm gezoh. Do war eehre Geld drin, der oon had des gsiehn, dass se des ningstoppt hot. De Vattr hot noh noch gsaat, sie selle doch der ald Fraa net alles holle. Noh hun se eehr bißche Geld hin geworf un „na babuschka" gsaat. Die Honichbussle hun se aa fun un mitgholl. Bevor se fort sin, hun se em Vattr uff's Licht gschlaa, dass es aus dr Hand gfall is un aus war.

De annre Taach had mer gheert, dass die selwe Russe in dr Happgass bei Urbans un in eehrem Gschäft aa ware un alles uff de Kopp gstellt hun. Im Keller ware in der Nacht die Urbans Wess Anna un die Vroni Englmanns verstecklt. Die hun sich mol dort un mol owwerm Dorf uffghall. Die Russe ware net in de Keller gang, sunst wer waas?

Ich erinnere mich, dass mer in dr Luckin e Joch Zuckerriewe ongebaut hade im 44er. Die hun meehr selle abliwwre im Herbst an die Gemeinde. Noh wär mei Vattr befreit wor vum Militär (Konzentrierung) for e Johr (aso for e Wintr, er war immer nor im Wintr ingerickt beim rumänische Militär). Die Zuckerriewe hu'mr im Herbst ausgemach, hun se awwer net abliwwre kenne. Die hun mer ingschlaa in die Kaule uff'm Feld for iwwer Wintr. Mei Vattr

hot die Riewe nemmi abgeliwwert, es ware 7 Kaule voll. Es is annerscht kumm.

Onfangs Dezember hun die Männer, die wu drhom ware, Holz mache misse for die Heiser heize vun dr Gemeinde, es Gemeindehaus un die Schul. Sie hade sich große Jutesäck uff de Buckl ghong wie e Rucksack un sin zufuss gang bis in die Darwasch. Do hun se Holz gemach for die Gemeinde un uff große Haufe gschlicht. Alle Tach hun se e Rucksack voll hoom getraa (des hade se verdient). So is des gang vun Onfang Dezember bis Weihnachte 1944.

(Die zwei Bände über die Jahrmarkter Gassen und ihre Bewohner können bestellt werden beim Kassenwart der Heimatgemeinschaft Manfred Rosner in Reutlingen, auch über E-Mail: Manfred Rosner, rosnerm@web.de).